



**SIARAN MEDIA  
KEMENTERIAN KEWANGAN**

---

**HARGA RUNCIT PETROL DAN DIESEL TANPA SUBSIDI TURUN 10 SEN  
BAGI TEMPOH 1 JULAI HINGGA 8 JULAI 2026**

---

Selaras dengan formula *Automatic Pricing Mechanism* (APM), harga runcit petrol dan diesel tanpa subsidi bagi minggu ini diturunkan berikutan penyusutan purata harga pasaran antarabangsa minggu terdahulu.

Bagi tempoh tersebut, harga runcit RON97 diturunkan sebanyak 10 sen kepada RM4.00 seliter. Harga runcit RON95 tanpa subsidi diturunkan sebanyak 10 sen kepada RM3.37 seliter. Harga runcit diesel tanpa subsidi pula diturunkan sebanyak 10 sen kepada RM3.97 seliter.

Harga runcit petrol dan diesel bagi minggu ini diumumkan hari ini bagi menyelaraskan tempoh harga baharu dengan pelaksanaan BUDI MADANI Diesel (BUDI Diesel) mulai esok, 1 Julai 2026.

Harga pasaran petroleum antarabangsa terus menyederhana berbanding paras tertinggi yang dicatatkan semasa kemuncak krisis Asia Barat. Perkembangan ini disokong oleh tanda-tanda pemulihan aliran bekalan global serta jangkaan bahawa rundingan berkaitan konflik tersebut dapat mengurangkan risiko gangguan bekalan minyak mentah.

Namun begitu, pasaran petroleum global masih belum kembali sepenuhnya stabil. Risiko terhadap harga minyak mentah, kos penghantaran dan kestabilan bekalan masih kekal selagi konflik belum mencapai penyelesaian muktamad, manakala pemulihan rangkaian bekalan juga mengambil masa.

Walaupun bekalan bahan api negara kekal mencukupi buat masa ini, Kerajaan MADANI menyeru rakyat agar terus mengamalkan penggunaan bahan api secara berhemat. Perancangan perjalanan yang lebih cekap serta pengurangan perjalanan yang tidak perlu dapat membantu memanjangkan bekalan negara dan mengurangkan tekanan terhadap perbelanjaan subsidi.

Penetapan harga runcit petrol dan diesel tanpa subsidi bagi tempoh **1 Julai hingga 8 Julai 2026** adalah seperti berikut:

### Harga Runcit (tanpa subsidi)

Bahan Api	Harga Runcit	Perubahan
RON97	RM4.00 seliter (harga 30 Jun 2026: RM4.10 seliter)	Turun 10 sen seliter
RON95	RM3.37 seliter (harga 30 Jun 2026: RM3.47 seliter)	Turun 10 sen seliter
Diesel	RM3.97 seliter (harga 30 Jun 2026: RM4.07 seliter)	Turun 10 sen seliter

Harga bahan api bersubsidi yang dikekalkan adalah seperti berikut:

Bahan Api	Harga Subsidi
RON95 (BUDI95)	RM1.99 seliter
Diesel (BUDI Diesel)	RM2.10 seliter
Sistem Kawalan Petrol Bersubsidi (SKPS)	RM2.05 seliter
Sistem Kawalan Diesel Bersubsidi (SKDS)	RM2.15 seliter

BUDI MADANI Diesel (BUDI Diesel) akan dilaksanakan mulai 1 Julai 2026, membolehkan rakyat Malaysia yang layak membeli diesel bersubsidi pada harga RM2.10 seliter melalui pengesahan MyKad di stesen minyak seluruh negara.

Kerajaan MADANI akan terus mengambil pendekatan berhemah bagi melindungi rakyat daripada turun naik harga, di samping memastikan bekalan bahan api negara kekal mencukupi dan terjamin.

### Kementerian Kewangan

Putrajaya  
30 Jun 2026